

Folkehøjskolit pillugit Inatsisartut inatsisaata allanngortinnera pillugu Inatsisartut inatsisaat (Meeqqat atuarfianni inaarutaasumik misilitsinnerit ingerlannissaannut pisinnaatitsissut, aningaasalersuinnermut aalajangersakkat aamma ilinniagaqarnersiat pillugit malittarisassat allannguutaat)

§ 1

Folkehøjskolit pillugit Inatsisartut inatsisaanni nr. 24, 18. november 2010-meersumi makku
allanngortinneqassapput:

1. § 1, imm. 1, naggatit aappaat ima oqaasertalerneqassaaq:

"Folkehøjskolit nalinginnaasumik peroriartuutaasumik ilinniartitsinerup iluani, ilinniartitsissutit
ataasiakkaat imaluunniit ilinniartitsissutit ataatsimoortut, taakkununga ilanngullugit timersorneq,
nerisassiorneq imaluunniit ilinniartitsissutit sullivilinnut sammisut, salliunerusumik inississinnaavaat".

2. § 1, imm. 3, naggat siulleq ima oqaasertalerneqassaaq:

"Folkehøjskolit ilinniartitsineq, misilitsinnissamut piareersaataasumik ilinniartitsinermik ilaqartoq,
neqeroorutigisinnaavaat, meeqqat atuarfianni inaarutaasumik naliliinerup ilaanik ingerlatsinissaq
siunertaralugu, tamatumunga ilanngullugit inaarutaasumik misilitsinnerit, ilinniartitsinerit ilinniakkanut
ingerlaqqiffusinnaasut allat, inuutissarsiutinik tunngaviusumik ilinniartitsinerup iluani ilinniartitsineq
aamma ilinniarnertuunngorniarmimi ilinniartitsissutit ataasiakkaat ilinniartitsissutiginerat, pineqartut
pillugit malittarisassat atuuttut naapertorlugit."

3. § 1, imm. 4, naggammi siulleq ima oqaasertalerneqassaaq:

"Folkehøjskolit ilinniartitsinermik inaarutaasumillu misilitsinnernik imm. 3-mi taaneqartumik
aallartitsinertat pisassaaq, ilinniarfimmik oqartussaasunilluunniit, inniakkamik pineqartumik
nalinginnaasumik neqeroortartumik, suleqatigiinnissamik isumaqatigiissuteqarneq tunngavigalugu."

4. § 1-imi, imm. 4-p kingorna immikkoortut nutaatut ikkunneqassaaq:

"Imm. 5. Folkehøjskolit ilinniartitsinermik ingerlatsinerit imm. 1-3-mi taaneqartunit allaanerusut
neqeroorutigisinnaavaat, ingerlatsisut allat tamanna pillugu isumaqatigiissuteqarfigereernerisigut."

Imm. 5 tamatuma kingorna tassaalissaaq imm. 6 imatullu oqaasertalerneqassaaq:

“Imm. 6. Naalakkersuisut imm. 1-5-imi aalajangersakkat pillugit erseqqinnerusumik malittarisassaliorsinnaapput.”

5. § 14 ima oqaasertalerneqassaaq:

” § 14. Ilinniartunut § 1, imm. 1-imut ilaasunut, Naalakkersuisut, aningaasanut inatsimmi aningaasaliussatut aalajangersakkat iluanni, folkehøjskolinut ingerlatsinermut tapiissuteqartassapput, ullorsiutit malillugit ukiup ingerlanerani sapaatip-akunnerini ilinniartoqarfinni minnerpaamik 700-ni ilinniartinneqarsimappata.

Imm. 2. Naalakkersuisut taxameteri malillugu tapiisarput, tamatumani aallaavigissallugit folkehøjskolimi sapaatip-akunneri ilinniartoqarfiit, akigitamik ukiut tamaasa aningaasanut inatsimmi sapaatip-akunneranut ilinniartoqarfimmut ataatsimut aalajangiunneqartartumik amerlisarneri.

Imm. 3. Folkehøjskolip sapaatip-akunneri ilinniartoqarfiit imm. 1-imi aalajangiunneqartutut amerlassuseqartut ingerlassimanngikkunigit, ingerlatsinermut tapit naleqqiussinikkut utertissavai. Utertillugit akiliutissat ingerlatsinermut tapit tunniunneqarsimasut aalajangersimasumik procentiattut annertussuseqassapput, taannalu aalajangerneqassaaq sapaatip-akunneri ilinniartoqarfiit imm. 1-imi minnerpaaffissaat eqqaaneqartut naapertorlugit ingerlanneqarsimanngitsut procentinngornerat naapertorlugu. Naalakkersuisut taxameteri malillugu tapiissutit tunniunneqartarnerat allatigullu allaffissornikkut ingerlannerat pillugit malittarisassanik aalajangersaasinnaapput.

Imm. 4. Ilinniartunit, folkehøjskolit ilinniartunut tapisissutisissutigisartagaannit, nammineq akiliuteqarnissaq piumasarineqarsinnaanngilaq.

Imm. 5. Ilinniartut tapiissutisissutigineqarsinnaasut amerlanerpaaffissaat Inatsisartut aningaasanut inatsimmi aalajangersarsinnaavaat.”

6. § 20, ima oqaasertalerneqassaaq:

” § 20. Ilinniartut § 1-imut ilaasut, tapiiffigineqarsinnaasumik minnerpaamik sapaatip-akunnerini 10-ni folkehøjskoliniittut, ilinniagaqarnersiaqarneq pillugu nalunaarummi aalajangersakkat naapertorlugit ilinniagaqarnersiaqassapput. Taamaattoq taamaallaat ilinniagaqarnersiat tassaasinnaapput ilinniarnarup aallartinnerani, unitsinnerani, tamatumunnga ilanngullugu ilinniartup qanigisaani pinartumik napparsimasoqartillugu toqusoqartilluguluunniit, ilinniarnarullu naammassinnerani akiliunneqarluni angalanerit, kiisalu folkehøjskolernermut immikkut aalajangiussamik ilinniagaqarnersiarititat nerisaqarnermut ineqarnermullu ilannganneqartut.”

§ 2

Inatsisartut inatsisaat atuutilissaaq 1. januar 2018.

Namminersorlutik Oqartussat, 8. juni 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut